

# Hipru

## Honi Tombaiva Geinna

## Hiprunindmba, Sesoava Ishovna

## Ombolnashara.

*Sesoana Ombolva Hevm Nengthalnonoa-mendekli.*

<sup>1</sup> Nemetva humeinmba doarava Sesoava moamba ishunvna pina tomonalmba hevna moashulnindnashara. Himba elsus lotho iavna, os vinvnamba, os vinvnamba, indakonda wevsana.

<sup>2</sup> Wo daipotava hona nambainam, pivva nengviluwulv, ovimba pethaimba imharavhowolvav, Sesoava doa ishunv pimba hevna ombolnashara. Aralva ombolnana vena pethamba, wo doa himba osoa hevna ombolmba wohkihpiana, manam manam honam vaohotholm.

<sup>3</sup> Wo ombolva pusamba vethana woklamsna Sesoanamba, wo pim lavhoaluhunv. Himba aimund ambo snal, Sesoa hev ten avm. Manimani memba Sesoava vewol venamba, ombolva kekaiv ilohv mongawatilm hevna keknasowolmona. Ombol kilumbshuawol vevna pimba sahaposwonindmba, wuvolmba almba. Wo doa himba av Sesoana nihanasis, mendekli king kuwulinda senakembellini.

*Sesoana Ombolva Mendeklinona, Ovsongol-nindva Owai.*

<sup>4</sup> Ombolva mendeklinonoa, henga he kuvhoa-wol vev ovsongolnindmba, wo Sesoava hemba ni-hilva vraohna, noi snal mendeklinonoa, henamba kuvhoawol vinvna.

<sup>5</sup> Honamba memba, noinda Sesoava osva ishomnavnamoa mongomba ovsongolnindr-inimba osva,

Yimba kana ombol. Daipotava kava os ov, kava  
yena aral lohv. *Buk Song 2:7*

Wo henga hev onam,

Kava si hena aral wohlohvav, wo himba si wohlo-hav kana ombol. *2 Samuel 7:14*

Hona moarava Sesoava aralva Kristusmba ni-hilva mendekli vrahona.

<sup>6</sup> Wo nonamba Sesoava hevna yiveltowondmba ombolmba waiprovnamba hona petharamba, himba os ona, wohposvhoara yunalm Sesoana ovsongolnindoa, hemba okuluvmona velmba.

<sup>7</sup> Men honam osm Sesoava ishunvna ovsongol-nindmba,

Sesoava kekaiv vena hevna ovsongolnindmba  
vuvimsna. Himba hemba hevna  
andranindmba tuhpiawol vena  
suwemda-msna. *Buk Song 104:4*

Memba osm, keknasowolva henamba Sesoanaminiangas prunvna, heva os ombolva hevna keknasowolna wohlohvna.

<sup>8</sup> Heva os Sesoava ishomnana honam osm hevna ombolmba,

Yimba Sesoa lohv, yimba si king kuwulalm  
wohavav yunalm yunalm. Yimba si kuwul  
wulluhunvav pevtindimba, wo os yimba si  
lehra lohohra lesvhoawol vevav.

9 Yimba und vev besal wevsamangas, sahoklalmba ovov. Wo noinda kava arapevpa yemba kikih vrena, nom kuwulm wulluhunilm, owapevriniva mongova owai, kava omnamanamo. Noinda yimba mindnamba undva kanandhav.

*Buk Song 45:6-7*

10 Wo Sesoa vena, os omnana hevna ombolmba, Mendekli, manimani suvevnamba, nemetva ye vena pethamba. Wo ye vena englana ovmba.

11 Wo hemba si mueisowa vewolvav, heva os yimba si wohavav yunalm. Hemba si malokolol samblamsna lelao vewolvav.

12 Yimba si pepetowolwolvav kayen tokolmsna. Yimba si vewolwolvra pikianmsna, nomba vethavra, nomba selvlahavra. Wo heva os yimba pevmba es eva weihaloh vrevav? Wo yenamba almba yunalmba si huti vevavmoa. *Buk Song 102:25-27*

13 Wo heva os Sesoava doava omnamanamo mongomba ovsongolnindrinimb osva,

Ovhoao hui kana nihanasis, verava, kava yena ungundmba slowothovav yena pevna englisram. *Buk Song 110:1*

14 Heva os ovsongolnindva ivtovlva, himba andra vinv Sesoom, wo hev hemba wolawollohv, nom kolvwrowlalm, hem nom he si henga lopshavavm.

## 2

*Pimba Hengamba Lopshalmba, Hevm Mendeklinonoa.*

<sup>1</sup> Sesoana ombolva nihilva mendekli vrana, noinda yeoa mindnam ambo novnavhora engivm, nomoa temba pimba numha vrevnamba Kristusnanamba. Wo osva yimba si phopivramoa moanonoariniva.

<sup>2</sup> Manara, nomba moamba, temba Sesoava pina tomonalmba ishunvnamba ovsongolnindnanamba, doa doara ambara levraholothunna pina tomonalmba, osmba tanam. Wo himba nomba mongova engmba owai vevna, hellelmba owai vevna, doa kinmba vrana nonalhrava, temba hevpa sahonamba vevnamba. Pimba honamba nonora av piv.

<sup>3</sup> Heva os nemel moanonoava, pimba nonamba lopshalmба, mendekli hevm. Wo noinda osva tanam pimba si kinmba vrivra, pivva osva allava, ovra, owai, ambo gekala uv honamba.

Yesus mendekli hev honamba nemelmomba selva ishona, monakoklarinimba lopshalmба, wo moalamangnindva nomba temba hemba hella vrivnamba, pim indkumbim wohlihalm vinna, osm hona lopshalmба monakoklariniva tanamolnam.

<sup>4</sup> Sesoava eva hevpa os venata, ambaram levraholothona, osm tanam memba moanonoa, honana vena, mendekliandrana manana manana. Wo eva nona hev indhanam moainal wohdaswolvnam hevsongolnashara, os hev ten und wohvrevnam.

### *Kristusva Wohlkahohana Indhanarinielm.*

<sup>5</sup> Sesoava pusvund venamoа ovsongolnindmba, kuwulmba wulvahalmба petha nemelmba, memba pivva nengviluwuvpa, owai. Memba nom dawonam petham, kav yem ten ishunvnam.

Heva os himba hevna ombolm onengmanavna, honam andram velm.

<sup>6</sup> Ten mongona Sesoana tombaira moa novol velohvm,

Sesoa, mani kava mendekli avma. Manaram yimba popeng vewol vev indhanamba?

<sup>7</sup> Mani wenokombawonamma yimba kamba desvhoana ovsongolnindna anglasingiva. Heva os yimba kamba mendekli nihilva vraohna, yimba kamba wulovongovna.

<sup>8</sup> Yimba slowothona manimani kana anglasingi.

#### *Buk Song 8:4-6*

Wo osva Sesoava slowothona manimani indhanana anglasingiva. Wo huiva vavawonamba, owai mana vemava ombamba lohvmoa, osva himba kuwulva wulvahunvmoa. Wo heva os owai, mendah pimba nunglivmoa ambarava, osva he kuwulva wulluhunv, nonamba manana manana. Heva os Sesoa doa Kristusmba pusvundthoana, hona andramba velmba, pina indhana indkumbina vuhera.

<sup>9</sup> Tanam, nemetva ambo tovolahana hutewonam, Yesusva luhunna ovsongolnindna anglasingiva, nonamba himba indhanarinielm lohvna petharava. Heva os daipotava pimba nungliv hemba, king kuwulna gol topi holothov, pusamba vethalm, eva okolalm, manara noinda kin guanam, eva dahanam. Manara noinda Sesoana wavrara hemba noinda daheinna indkumbimba.

<sup>10</sup> Sesoava manam manam hengas vena, wo henah hevelm wohlohy. Wo noinda himba lehra undva vrena, indkumbimba hevna towandalmba wonalm vev hevna kembellam hevna pusam-

banakambara. Sesoava doara undva vrena, osva Yesusva si indhanamba lopshavav, heva os hevpa si kinmba nihsesoanahonam vravav. Wo no nihsesoanamba Sesoava engla wuleihawolvna, henomba temba kuwulva deisumbingavpa indhanamba monakoklarininapenamba senakembellamba.

<sup>11</sup> Pimba nonora av, Yesus indhanamba kekaiv vev, Sesoanangas alm, wo nomba temba kekaiv vevpa Sesoatindilmba, himba nomba yunam mongawapendarini. Wo noinda osva himba lou vevnamoa, sevelolmba hemba, osva, kana towandasla.

<sup>12</sup> Hev Sesoa aram ishomnana,  
Ara, kava si ishunvra no yetindimba yemomba. Kava si yemba okolavra kavna towandaslanamusrava, nonamba yetindiva yemba kusomnavrava, sembayang venalmba. *Buk Song 22:22*

<sup>13</sup> Hev vena, os unna,  
Kava Sesoa aram hehga venav, nom hev ten kam ovlahamnanam, venalm. *Aisaia 8:17*

Wo osoa hev vena, os ona,  
Kava men otovotalmba wonav, nomba temba aramba kaindava sandhanamba. *Aisaia 8:18*

<sup>14</sup> Nom otolm maimba Yesusva temba unvna, mundilm tendona onganam, hevna nihilnahonam men avnam. Wo Yesusva eva hevpa osta nilhanata, nihilva snal ilohvna, ten he avnam nona. Himba honamba osm memba vena, hemba dahavav, wo hona monana himba indkokla vrevav indhanarinimba, henamini phov, osmba vev, os gav, os gav, indhanamba dalalmba. Himba nomba yunam Setan.

<sup>15</sup> Yesusva indhanarinimsna nilhanamba, wo daha, osm himba doa kilumbshuawol vena hemba. Himba os avna, ovna, ombandhana andranind Setanna, manara noinda elsus himba pem vivna dalnapenamba.

<sup>16</sup> Tanamangas ovsongolnindva nomba owai, temba Yesusva kolvrowol venamba hemba, heva os indhanam, nom ten Sesoam amnavm, Aprahamna undnamsna.

<sup>17</sup> Yesusmba kinmba opramnavna osva i. Honamba mongal wevsava hena towandaslalmba vinvnamba, hemba eva os venavnata. Wo no kindava himba wohnilhakohana sembayang andranindna kuwulmsnamba, himba si wavra vovhueinvav pimba sahaposwonindmba. Wo eva himba si wohengvav Sesoana aralna moamba, nonamba himba andrava venavrava, memba andrava, kilumbshuawol velm sahaposwonindm. Wo osva Sesoava si hemba hengava wusprunvavmoa hevna sahaposworava.

<sup>18</sup> Wo daipotava doa himba pim kolvrowol vev, men mana vemara eiswol vowel velm vevm. Manara, eva himba kinmba nihsesoanahonam vranata, wo newondmomba hemba sihamnana, osm noinda indkokla vera.

### 3

#### *Yesusva Kuvhoana Henga Mosesmba.*

<sup>1</sup> Seh, yeoa ningminivm Yesusm. Yemba doa englava siheinna Sesoava hevtindilmangas. Sesoa wolaihaprinna Yesusmba pimba, wo himba sembayang andranindna kuwulmsna wulluhunv pim, wo himba wulprunna pimba nemel Sesoana

moamba. Pimba doa os una, pimba keknam undnahonam amnav hemba.

<sup>2</sup> Wo Yesusva wohvevna manimani nomba temura, Sesoa hev ten omnavnam, os ten Moses vevnam. Mosesva vevna manimani temura, Sesoa hev ten omnavnam, vinilm hevtindim, nom Sesoana doaraminimom wohengivna.

<sup>3</sup> Indhanariniva kuwulva temba wulluhunvpa hevtindinamba, annind, annind hemangas longong ovriv mindnamba, owalmба ambo snakand. Eva osta Yesusmba. Wo noinda Yesus kuvhoana nihil mendeklinamba henga Mosesmba.

<sup>4</sup> Kuwulva hindtindina hindtindina os indakonda vilunv, wo heva os Sesoangas manana manana kuwulva wuleinv.

<sup>5</sup> Mosesva temura andrava vinvna Sesoatindimba, nomba Sesoava omnavnamba hemba velmba. Himba nom ishunvna, sewonamba si Sesoava os ishovra.

<sup>6</sup> Wo heva os Kristusva keknam wohlohvna Sesoana hevna ombol, he Sesoatindina kuwulva wulluhunv. Wo pimba tanamba avavta Sesoatindilmba, pivva osva allava keknamba undnahonamba, wo nengviluwuvra, vuhemba besalva, Sesoa doa pimba ovlahinna.

### *Pioa Wohviliuwulkovlohra, Yesusm Dandm Engalm.*

<sup>7</sup> Hillu, pioa daipotaoa engalvohra Sesoasongolm. Himba os ona, Daipota hillu, nom ten Sesoa ishunvm yem.

<sup>8</sup> Manam yemba alhwol vevra, osva nemetva simbehumunpevpa temba vivnamba, nonamba himba henga meis hehara omnavna kamba. Di

himba sahalpethara temba kamba vinivnamba, osmba verava, ora kam ovunv noinda?

**9-10** Tahonmba 40pelara lohvna diva sahalpetharava, yena simbehumunpevpa nunglina, nomba manam manam kava vevnamba. Wo heva os himba kam umnivna, osm ora pim honinda ovunv? Wo kava mindnam wusprunvna hemba, wo kava os ona, himba kalmba avmoa keknamba. Yimba doava levrapivolvmoa kana monamba.

**11** Wo noinda kamba wusprovna, wo ongawola lahinvna, yimba si owaimomolmba saivvavmoa kana ehapetharava. *Buk Song 95:7-11*

**12** Seh, novkalana avm, osra ata ye mongo homeis und koholotho vrevm, keknamba loholmba owai vevra. Honi si ollawol vevra yemba, engalmba Sesoamba, nomba temba wohavpa.

**13** Heva os sia okomba nonam nonam, yeoa pevmoa suwenamandna ovrevm. Vewuvm honaoa ambo elsus. Akolvra vevm, osm mongova yeriniva si homeis puehahnindrinielm lohvm, wo und koholotho vrevm, manara, sahaposwona bumbrisilla. Ata yimba os maim nengvra, mani eva lohv honindava? Heva os Sesoava yemba mendah nengzewolowow.

**14** Pimba indkumbiva av Kristusna sehel. Honamba memba tanam, pivva osangasva allava, osva verava, eunillam keknam undnahonamba, noi ten seilm doara piv nona anam.

**15** Sesoana doaramini tombaimorava os novol velohv,

Deti hillu, nomoa himba temba ishovpa. Manam yemba alhwol vevra, osva nemetva temba nonamba yenamba simbehumunpevpa

meisya sahonamba hehara omnavnamba  
sesmba Sesoamba. *Buk Song 95:7-8*

<sup>16</sup> Anmund himba nomba osva Sešoana moala-mangmba hillinamba, wo henga meis hehara omnavnna? Indhanamba noi, temba Moses ten wonphonam Isiprini, pina simbehumunna tomonalna.

<sup>17</sup> Wo Sesoava anmundm wusprunna, osva venamba, tahonmba 40pelara lohvna? Himba nom wusprunvna, ten indkokla vivnam sahonam, wo hemba noinda sihavna di sahalpetharava.

<sup>18</sup> Wo anmundm Sesoava ishunvna, nomba himba temba osva ongawola lahinvnamba, himba si saivvavmoa kaindava, eha vewuvulmba? Himba ishunvna pina tomonalm, nom ten hellelm owai vivnam hem.

<sup>19</sup> Wo doa ambara men ambo osva nungliv, hemba numbulnamoa, saivolmba, vralmiba Sesoana ehavuhemba, manara noinda himba keknamba undnahonamba avnamoa.

## 4

*Pivva Honamba Pethanindva, Memba Pivva Avpa Sesoanamba, Si Saivra Vuhemba, Eha Vewuvulmba Senakembella.*

<sup>1</sup> Doa Sesoava pimba ovlahinna, osva pivva eva si saivrata, hena eha vewol vuherava. Wo pioa ambo pepehna vivra, osra mongo pirini si homeis owolakohavm ehavhoram.

<sup>2</sup> Pimba hillivna besal nemelmomba, os ten nemet Israelnindm vinvnam. Wo heva os nomba moamba himba hillivnamba, hemba kolvwrowol vevnamoa. Himba hillivna, heva os owai, vreivnamoa undnahonamba.

**3** Pimba nomba memba avpa undnahonamba, si saivvav, wo aevulvra Sesoana ehavhora. Heva os nemet Sesoa ten ongawolnam hindm, nom ten henoi wuleihivnam, alm undnahonam,

Wo kamba wuspronamba, wo ongawola lahin-vna, unna, yimba si saivvavmoa kana ehavhorava huiva petharava. *Buk Song 95:11*

Tanam honamba moamba ishona, nomba manam manam temba phonamba Mosesna novrava. Heva os pivva nonora av, nemetnonoava, nonamba Sesoava vevnamba pethamba, himba nonam wohvepiana andrava hevnamba, wo doa engla wuleihawolna, ambo avna hevna ehavhorava.

**4** Noinda mongova men Sesoana doaramini tombaimorava lohv, himba ishonamba saptumomba, ona, kava kavna andrava doa wohvepiana, mongavhora vah iana sapturamba.

**5** Wo heva os doa pimba honamba moamba hilli, Sesoava os ona, himba si saivvavmoa kana ehapetharava.

**6** Noinda pimba nonora av, osva si monglava saivvav, wo avav Sesoana ehavhorava. Wo heva os nemetva temba himba hillinamba hesnamba, osmba beswonamba almiba, owai saivnamoa. Himba saivnamoa, manara, himba wohengivnamoa.

**7** Wo doa Sesoa nengavnangm sesvho vrevna mongnanamba, os sevriv, deti. Himba ishona detimomba doa doara heva nemet Devitnana. Noi mongal tombaimomba, nemet ten kav yem ishunim.

Detiva hillu, nom he ten ishovm. Manam yimba kelsombovhova vivra. *Buk Song 95:7-8*

Hona moarava pimba nonora av, daipotava pinamba mendah tuvpa velaihaluhunv, Sesoana ehavhoramba saivolmba.

<sup>8</sup> Pivva nonora av, osva nemetva Yosuava deisumbingana Israelnindmba Kenanpethaman-gas, Sesoana ehavhoramba owai. Pimba nonora av honamba, manara, Sesoava ishona honamba henga mongnasimba detimomba nomba.

<sup>9</sup> Wo honamba os nungliv, nomba ehavhomba Sesoatindinamba mendah sis prunv. Pimba os ningthiv nomba, vah iaevul okomba saptumba, honamba moamba ambo weihaloh vriv osm Sesoana senakembel.

<sup>10</sup> Memba ambo osm, himba nomba sihallava Sesoana ehavhoramba, si eha vawovra hevna andariniva, os ten Sesoa venam.

<sup>11</sup> Homeista, pioa ehlana keknam alahmana velohra, Sesoana ehavhoram saivolm. Pioa lehalvohra, osnapenam, anvema si homeis no wevsam engvm, ten henoi Israelnind mongla pilpikovvnam moam, wo plel venamba, doa himba owolakovvna.

<sup>12</sup> Hillu, Sesoana moamba indhanarinimsna lohv, wo andra wohvev hevnasowana. Nerawol lohwolv ovlakasmsna, nerawol lohwolv, os vei, mongnasis, sis. Wo heva os kuvhoav henga ovlakasmba. Wo piindamba nihmeramba wohsiheinv, dom ten und endvm. Dom hevm hovrahovram, kel ten kelvevm. Wo Sesoana moamba lesvhoawol vinv pina indakonda nengavnangmba pina undrinimba.

<sup>13</sup> Noinda mana vemava es eva kithavav

Sesoana novhuiva, owai. Manimani ambarangas hena novsra. Wo yunam hemoa pioa temura ishumnivra, osmoa ora, os kava avna seilva.

*Yesusva Pina Mendekli Sembayang  
Andranindna Kuwulalmsna Luhunv.*

<sup>14</sup> Pinamba luhunv mendekli sembayang andranindna kuwulalmsna, hehoni doa vongana senakembellam, pinavhoram Sesoana novram. Wo noinda osva pioa wohkevrolahra keknam honaoa, memba pivpa keknamba undnahonamba nonamba amnavpa hemba. Himba Yesus, Sesoana ombol.

<sup>15</sup> Pivna sembayang andranindna kuwulalmsamba, himba pimba wavra vrowol vev, nonamba pimba indkoklava vivpa. Manara, himba temba avnamba petharava, hemba manara manara eva os lehawuvmona vevna, no sahaposworava, men piv avm, wo heva os himba indhanarini windel lohvna.

<sup>16</sup> Noinda pioa amblohra pepehhui beswonam amballam Sesoana novram, di ten hev no moainalvhora ovavho vevm. Di pimba si nunglivav, osva eva himba pimba undalm vewol vevta. Wo himba si pimba wavra vovhueinvav, pim kolvrowolalm, nonamba pimba und vivrava.

## 5

<sup>1</sup> Yutanindna sembayang andranindrini mendeklimba, Sesoava pusvundthoavpa, mongom nom indhanahovrinim, henom, ten andra vinvm, os vei, Sesoam, eva indhanam mongavhoralm. Wo nomba sembayang andranindrini mendekliva, himba dambroh

vev indhanana innemba besalva Sesoam, wo eva tatamba wohwuweihamnav Sesoam, nonam indkoklam maisasa vewol vinilm.

<sup>2</sup> Nomba sembayang andranindna kuwulva hevpa eva ambo indhanakoklarini lohvata. Wo noinda oiwonapetamba vinv hindmba, nomba temba himba titnamba indkoklava vivpa, wo eva nom manimani ten sahonam vivm.

<sup>3</sup> Hembra hevmba doa wohpelpena sahoklara, wo noinda himba alta sengsowarava tatamba wohwuweihamnav Sesoam, osm kana indkoklamoa maivethara. Wo eva hev vev, tatamba wohwuweihamnav Sesoam, osm indhananamoa indkoklamoa maivethinda.

<sup>4</sup> Sembayang andranindna kuwulalmba, indhanariniva loholmba vevpa, himba si noinda mendekli nihilva nulluhvav. Wo heva os mongova indhanariniva himba hevmba pusvundthoavavmoa hona andraramba. Himba heva sihavav hona andrarava, Sesoana hevna moara, os ten Aron lohnam, Mosesna boasalal nemet.

<sup>5</sup> Wo eva osta Kristusva himba hevmba pusvundthoanamoa, mendekli nihilmba nulluhulmba, osalmba ovra, sembayang andranindna kuwul. Heva os Sesoa hemba pusvundthoana hev. Sesooava hemba omnana,

Daipotava kava os ov, kava yena aral lohv. *Buk Song 2:7*

<sup>6</sup> Wo mongona Sesoana doaramini tombaimorava Sesooava os ona,

Yimba sembayang andranindrini wohalm yu-nalm, sembayang andranindrini snal, ten lohnam Melkisetek. *Buk Song 110:4*

<sup>7</sup> Mendahva huiva petharava Yesusva avnamba, himba wenamona mindnam sembayangmba vevandnam velohmanavnam aralmba. Ona, ara, kam lopslaho, kamba dahavavmoa. Wo hena sembayangmba wohhellangas vevna, manara himba ambo os ona, Sesoaa, kava owai, mana vemava memba yimba kamba velmba venavpa, ambo yeinda lohv.

<sup>8</sup> Yesusva Sesoana ombol lohvnata, heva os himba ambo kin guaomana vevna, nomba temba kinmba hemba promnavnamba, wo no monana himba osva vravna, kava wohengv arana moam.

<sup>9</sup> Wo os Sesoava hemba englava wuleihawolna, luhunilm pina sembayang andranindna kuwulmsna besalnonoava. Wo himba lopshav monakoklariniva hindm, nom ten henoi hem keknam engivm.

<sup>10</sup> Osoa doa Sesoava aivongo vevna Yesusmba sembayang andranindna kuwulalmsna, sembayang andranindrinvia snal, ten Melkisetek lohnam.

### *Yeoawohavm Keknam, Yemba Eva Osva Wiki Vewol Vivra.*

<sup>11</sup> Kava esvema tevlanamsna moamba ningiwulav honamba, yemba ishunilmba. Wo heva os owai, manara noinda es eva temurava velokusathivav, noinda yimba mendah oiwonapetam velokusa vilimby.

<sup>12</sup> Yimba doara Kristusnindilmba doa lovahna, osm daipotaoa yeoa numhowol vivm monglamoa. Wo heva os owai, yemba pevmba eva mongo heva prunvav, yemba numhowolalmaba Sesoana

mimirinina moanamba hengamba. Manara, yimba mendah hina av, nomba moamba vreinamoa. Noinda yimba mendah av, os maim oi, tetm vev. Yimba mendah limbina, innemba nelmba.

<sup>13</sup> Mendahva temba monglava wekal velohvpa tetrava, temba mendah otol lipuel englarinimsna. Himba mana vemamba wiyerava avmoa, beswonamba almba.

<sup>14</sup> Wo heva os innennamba hindm, nom ten doa hevna velgona avm. Himba doa doara lehawuvmona vevna, levrapivolalmba, osmba besalm eva sahoklalmba Sesoana novrava.

## 6

<sup>1-2</sup> Yimba mendah hina av, wo noinda pioa wohweisvrelohra, wohksavhoalohra moanonoana, temba pimba weihaloh vowel vevav os, pivva pivna velgona av. Hengava manam pimba nomba moamba doaraminimba oningvhuvav, nemetva temba pimba lihalmba vinivnamba Kristusmba. Hengava manam pimba pupul vowel vivra moanamba, osmba meis hehara uwilango sahoklarinioa, noindava temba suwekembellamba gavpa, wo amnavm keknam Sesoamangas.

Manam pimba hengava nengvhoanga ovuvav, Kristusmomba pona posvandalliniva, eva nomba englava temba huhlinvpa, eva pulvolmba pokamariniva, eva si lovahvav Sesoana wetatmora.

Pivva osva vellava, temba os, maim oi, boagalna milukulnamba doangas wosalohgav, heva os deuvpa wulundthoavmoa. Heva os pioa pivna kelsra lohvhoaprara.

**3** Wo pimba Sesoava wohlundthoatava non-amba, pivva osva si pivna kelsra lovahvav.

**4** Heva os monglamba indhanamba hevna velgonamba amba owai vellava, es eva si hengava hevmba weihaloh vowel vivav. Himba doa Kristusomba hillina. Himba doa und kanandhaprana senakembelna awothowolna, wo himba Sesoasongolna av.

**5** Himba doa levrapivolna, osva snal besal Sesoana moamba, wo himba vreprana keknasowolva henamba hona pethariniva.

**6** Wo heva os himba pewoleihitava Kristusmba, owai, monamba lohvmoa hengamba, osmba nomba pelmai vithivra, beswonam avra. Hona wevsanamba himba vevpa, himba hev lopethav Sesoana ombolmba krusera henga, wo himba ambo louwolm vinivna temba osva Yesusmba indkumbina novrava muserava.

**7** Monglava indhanamba snal av pethamsna, maim oi, po ten elsus lolohvm nosra. Wo no petharava besal innemba phov. Indhanamba nomba endhavpa osorava, wo noinda hemba wohlundthoavra Sesoana awothowolva.

**8** Heva os monglava pethamsna indhanamba av, soposalna weselposalva phov ilkokla, wo owai, pethakokla. Wo mani eva eukwonamma Sesoava si os ovav, mueisowa wohvera. Si indkokla vrevav Sesoava suwena.

**9** Kana sehpuina, daipotava kava yemba honi kinil moamba vrahuny. Wo heva os kava os nengv, yemba si indkokla vilovavmoa honindava. Kava os nengv, osm Sesoava yemba nom si monakoklariniva lopshavav.

<sup>10</sup> Sesoava indhanarinikoklava owai, himba besal, noinda himba si maivethinvramoa andrava yenamba, temba yimba viwul vevpa, eva und vivm pev hevm, noinda yimba hevtindim kolvrowol viv.

<sup>11</sup> Kava indkumbim yemba ninginv, no mongawa andram wohviluwulkovolm, os ten pev wohavm. Wo yimba si tanam dumbvra vuhemba besalva, nomba pevpa keknamba undnamba ningvrava.

<sup>12</sup> Kava yemba ninginvmoa, osva aivo viu, owai. Os vivm, ten noi avm undnahonam keknam ambo. Yimba indkumbiva si vrapravav, nomba Sesoava temba ovrahunnamba.

### *Sesoava Tanamolmoa Ovrohona Aprahamba.*

<sup>13</sup> Sesoava moamba ovrohvnama nemetva Aprahamba. Mongova hengava avnamoa, mendekliva kuvhoalmba Sesoamba, osmba ata Sesoava hena nihilm osevratava, moam hevnam nonam pemokaltha ovrelemba. Owai, himba hevm osevrana, nonamba himba Aprahamba ishomnavnamba.

<sup>14</sup> Hev omnana,  
Kava tanam yemba ishomnav, kava yemba si awothovav, wo yenamba si simbepolva mindnam phovav. *Stat 22:16-17*

<sup>15</sup> Aprahamba indwonam osva amana vevna, nomba temba Sesoava omokaltha ovrenamba. Wo venamba, himba wohdombna, nomba Sesoava temba omninanamba.

<sup>16</sup> Indhanamba elsus viv, osva mongona owalna nihilm osivrivm, henoi mendekli ten lohvm, nonamba moamba himba pemokaltha ovrelemba vevpa. Wo honinda osva liheiv, nomba moamba

tanam. Hengava himba hoanavho vrivavmoa nomba moamba.

<sup>17</sup> Sesoava hevtindimba lihawolalm vevna nom hevna moam, osm tanamolnam. Himba lihalm vevna, osm hevtindiva si dumbvav, nomba himba temba ovrahunnamba. Himba undva osm vrinv, heoa beswonam levrapivolla, osm himba hevna undmba weihaloh vrevavmoa. Wo os Sesoava pemokaltha ovrena, hev ten ovrahunnam.

<sup>18</sup> Honamba mana vema samblava, es eva weihaloh vrowolvav. Sesoava es eva dasalmba ovov, nonamba himba ishovnamba moamba, wo es eva himba dasalmba ovov, nonamba himba pemokaltha ovrvnamba. Honamba mana vema vama samblava pimba numhowol evev, henoi men ambvm Sesoaindam, nouwalm. Himba deiswilv pimba, nengviluwuvulm, nom hev ten pim ovrahunnam.

<sup>19</sup> Nomba Sesoava temba ovrahunnamba pimba, wo pivva mendah dumbvmoa, nomba snamba maim ora, besalbesi wenahonam, wanda ten dembhapuv vewol vevm, botm nonapopolm pethalm. Wo pimba undnahonamba noinda keknamba endvpa, manara, wemba nomba kleihalohv kayensis tuvrava. Nomba kleihalohvpa diva moainalyhorava tempelduvrava senakembellava, memba osm, pimba Kristusm undnahonam keknam amnav, doa himba pimba kilumbshoawol vena pivna indkoklariniva.

<sup>20</sup> Yesusva doa domba hesna pimba mi deisumbingana, pinavhoram luhunilm Sesoana novram. Himba doa wohnilhana sembayang andranindna kuwulalmsna, yunalm wohalm, os ten sembayang andranindrini Melkisetek lohnam

nemet.

## 7

*Sembayang Andranindrini Melkisetekva,  
Himba Pim Numliheinv, Osm Kristusva Os Vev.*

<sup>1</sup> Melkisetekva himba king kuwul wulluhunvna Salemkembelna, wo sembayang andranindrinielm wohlohma navna Sesoam senaminim. Himba anongla evena Aprahamiva monara, nonamba Aprahamba king kuwulmba helvakomo vunganamba, henga os provna deuvram. Nonamba himba anongla evewolnamba monarava, Melkisetek phona, awotho Apraham. Yimba nonora honamba av pev doara.

<sup>2</sup> Wo Aprahamba manimani nomba iprovnamba daosriniva, hovra powalwolvna 10pelara, 9pelarava hevm poavlahavna, mongal Melkisetekmba poavraohna. Melkisetekna nihilva pivva osm ambo weihaloh vriv, king kuwul wevsalva besalna. Himba king kuwul wulluhunvna Salemla, memba yunam osm, himba king kuwulva lohv, indwonam beswonam alm.

<sup>3</sup> Nomba tit viv, osva ani ani dihi Melkisetekna arali avaliva? Osva tit viv henotindirini, avalva hemba nonam lengna, wo henanam eva hemba dahana. Noinda Melkisetekmba os ningminiv, himba Sesoana ombolmsna lohv, henoi ten wohavm osangas yunalm, wo osva Melkisetekva sembayang andranindrinielm yunalm wohandra vawov.

<sup>4</sup> Yeoa ningminu hona Melkisetekm, himba mendekli wohlohma. Apraham pina tomonal

wohva besalva poavraohna Melkisetekmba, nomba himba temba dombnamba daosriniva. Men honinda pivva osva nunglina, Melkisetekva mendekli, Aprahamba owai.

<sup>5</sup> Wo eva lohohmorava os ona, nomba temba Livaitindiva phonamba sembayang andranindilmaba, heoa momongo ambo dumbunvra innena dinamba hevna mongawa Israelnindnanaoa. Himba mongawapendarini Aprahamtindita, heva os heoa hevna manimani hovra henga popowol vivra, vevra, hevm, eva Livaitindim.

<sup>6</sup> Melkisetekva himba Livaitindiriniva owai. Wo heva os Aprahamnamininiva manimani himba momongo poavrombol vevna. Wo he awothona Aprahamba, hemba snal, himba wulavna Sesoana moamba.

<sup>7</sup> Pimba indkumbi osva nonora av, mendekli indhana awothowolva viv ombandhanamba. Wo osva pimba nonora av, osva Melkisetekva nihilva mendekli wulluhv, wo himba kuvhoav henga Aprahamba.

<sup>8</sup> Nomba sembayang andranindva Livaitindiva manimani poavrombol vinvna Israelnindnamba, heva os no sembayang andranindva indhana, ambo snal men piv, ten vev, avm mendah, eva sihavm. Heva os Melkisetekva himba poavrana Aprahamnamini, wo Sesoana doaramini tombaimorava osva novol velohvmoa, osva hemba dahana.

<sup>9</sup> Temba hev Livai, he poavrombol vinvna manimani Israelnindnamba. Wo noinda pivva olhombaba olhv, osva nonamba Aprahamba poavraohnamba besalva wohva Melkisetekmba,

Livaiva eva os venata.

<sup>10</sup> Manara noinda Livaiva mendah avalva lengnamoa. Heva os Livaiva doara nihmera simbelinda Aprahaminda livna, nonamba Melkisetekiva anongla evenamba Aprahamiva. Pivva olhmonamba olhv ambo.

<sup>11</sup> Lohohmomba indhanamba honi vrahunna, sembayang andranindna andraoa wohluhunvra Livaitindiraoa. Heva os hena moarava indhanamba kilumbshuawol venamoa Sesoana novrava, owainonoa. Wo osoa henga mongo pruvnva, hemba andra vinilmba. Nom snam kava onginv, men Melkisetekm, snamba owai, Aronmba temba lohnamba, himba sembayang andranindna kuwulalm luhunvna Mosesna novrava.

<sup>12</sup> Wo nonamba osva sembayang andranindriniwa indanam mongova provrava, eva lohohmomba henga weihaloh vrivrata. Kristusva Arontindiriniva lohvmoa, noinda osva himba indamoia wulprov.

<sup>13</sup> Kava honamba ishumniy memba Kristusm. Himba indanam mongtindirini lohv. Wo notindiriniva mongova owai, sihanamoa, sembayang andranindrinielmba, andra velmba alta sengsowaramba.

<sup>14</sup> Men ambara ambo lohv, osva pina mendekliva prinna Yutatindirini. Wo Mosesva sembayang andranindmomba osevranamoa no hetindiriniva.

### *Yesusva Snal, Ten Melkisetekkumbi Lohnam.*

<sup>15</sup> Wo honi doa muesa undullava lohvhoana. Pivva men nungliv, os doa mongova indanam sembayang andranindriniwa proj, himba snal ten

Melkisetek lohnam. Wo himba kuvhoawol vev Livaitindina sembayang andranindmba.

<sup>16</sup> Himba sembayang andranindrinielmba, Mosesna lohohmomba hemba awonamoa. Manara, himba Livaitindiriniva owai. Himba sembayang andranindrinielmba hevna undna lohna, osm si yunalm yunalm os wohavav. Noinda himba keknasowolna lohv.

<sup>17</sup> Sesoana doaramini tombaimorava, mehonam honi os omnana hevna ombolmba, Yimba sembayang andranindrini yunalm yu-nalm, sembayang andranindriniva snal, Melkisetek ten lohnam. *Buk Song 110:4*

<sup>18</sup> Noinda pimba nonora av, osva Sesoava doa doaraminiva lohohmomba amballa velahana. Manara, pimba kilumbshuawol vevmoa.

<sup>19</sup> Manara, Mosesna lohohmomba mana ve-mamba weihaloh vrevavmoa besalalmba. Wo heva os daipotava doa Sesoa pimba besal mon-amba vuenghinna. Wo hona monana pimba am-bvra murapetamba Sesoaindamba, nemeltovm selthoalm.

<sup>20</sup> Osta hevm mendeklinonoa, osva Sesoa pemokalthana vrena, nonamba himba Yesusmba aivongo vevnamba mendekli sembayang andranindrinielmsnamba. Nonamba sembayang andranindrinitovpa hohlo vrowovnamba Livaitindiva, hengava mongova pemokalthanamoa, owai.

<sup>21</sup> Wo heva os Kristus hohlona sembayang andranindrinitovmsnamba Sesoana moarava. Sesoava os ona,

Kava doa omokalthana, kava hengava si kavna miva weihaloh vrevavmoa. Ye

men sembayang andranindrinielmba  
wosambalothov, osmba yunalm wohalm.

*Buk Song 10:4*

<sup>22</sup> Memba honamba, osm honamba moamba,  
Sesoava pimba indhanamba vinna Kristusna andra,  
Kristusva ambo hoanavho vrelm. Wo honi  
nemel moamba henga kuvhoav doaraminimba.

<sup>23</sup> Osta eva, nonamba mongomba sembayang  
andranindriniimba dahavnamba, himba henga  
viluwulkohanamoa, andra velmba, osva sem-  
bayang andranindrini. Wo noinda osra esvema  
avna sembayang andranindva.

<sup>24</sup> Wo heva os Yesusva wohav yunalmiba.  
Himba si wuleihavavmoa, andra velmba osva  
sembayang andranindriniimsna.

<sup>25</sup> Wo noinda himba elsus wohlopshowov,  
nomba himba temba ambvpa Sesoaindamba  
heinda. Himba honamba vevav, manara noinda  
himba elsus wohav lihra, Sesoamba osahmanalm  
no indhanaindamba, nom henoi ten pepra vevm  
Sesoana novram.

<sup>26</sup> Lehra pimba sna indhanariniva luhunillava,  
sembayang andranindriniimsnamba, pimba  
kolvrowol vevra. Himba dendalangas, himba  
indhanarini windel luhunv pihovrava. Himba  
indasvho luhunv pina sahaposworiniva. Wo  
he wohkuvhoawol vev ovsongolnindmba  
senaminimba.

<sup>27</sup> Himba snamba owai, temba monglava  
nomba sembayang andranindva doaraminiva  
anamba. Himba tatamba wohwuweihivna,  
weisumbolm alta sengsowarava elsus, miva  
hevna indkoklambsna, wo eva sismba indhana  
indkumbina indkoklam. Heva os Kristusva

hevpa nengvnamoa, osmba velmba. Himba mongawulm wohvena, yunalm wohloholm osangasm, nonamba himba hevm wohkihpiana.

<sup>28</sup> Lohohmoa pusvundthoawol vev sembayang andranindna kuwulalmba, henoi indhanarini, ten lohvnam indhanakokklarini ambo. Wo heva os Sesoana pemokalthamomba prona sism lohohmorava. Vrena Sesoana ombolm, mendekli kuwul sembayang andranindrinielmsna. Wo no ombolva si wohavav yunalm, Sesoava doa engla wuleihawolna hemba, himba hevna velgona daipotava doa wohlohv.

## 8

### *Yesusva Pina Sembayang Andranindrini Kuwulmsna Luhunv.*

<sup>1</sup> Men hona moana plalva lohv, memba kava yemba ishunvpa. Pinamba luhunv sembayang andranindrini kuwulmsna, wo himba doa ovhoana nihanasis king kuwulna vuhera senakembella.

<sup>2</sup> Pina sembayang andranindrini mendekliva andra vev Sesoana deuvra sena, Sesoana vuherava. Himba andra wohvawomnav deuvnonoara, sembayang venalmba, nomba deuvpa Sesoa wohvena, mongova indhanariniva owai.

<sup>3</sup> Indkumbina sembayang andranindna kuwulna andrava luhunv, himba dambroh vev indhanana innemba besalva Sesoam, eva tatasowava wohwuweihamnavna, nonam indkoklam maisasa vewol vinilm. Wo eva pina sembayang andranindna kuwulmsnaoa eva os venarata Sesoamoa.

**4** Membu pinamba sembayang andranindna kuwulva luhunvpa, daipotava himba huiva petharava lohtava, ata sembayang andranindrinielmba lohtamo. Kava ishov honamba, noinda huiva men mendah lovahv, sembayang andranindilmaba Livaitindiva, himba lohohmomba engiv, indhanana innena tatasowanamba dambroh viv Sesoam.

**5** Wo andrava nomba himba temba vildavpa petharava, ambo lihvrv nom sembayangduvnonoam, ten senakembella lohvm. Wo nonamba Mosesva velmba vevnamba Sesoana lairduvmba sembayangdamba, Sesoava hemba ongawolana, omnana,

Ambo novnavhora vevm nomoa manam manam, yemba temba kava nethamnanamba nengavnangva diva doarava Sainai olorava.

*Kisim Bek 25:40*

**6** Wo heva os nomba sembayang andranindna andrava, temba Sesoava Yesusmba vraohnamba, mendeklinonoa, kuvhoav nomba andrava, temba deiswilnamba monglamba sembayang andranindmba Liyaitindimba. Wo eva ambo osoa, nemel moamba, noi Yesus ten wulprunnam Sesoanamini hevtindiram, mendeklinonoa, henga kuvhoav kololmba doaraminimba. Wo eva nomba manam manam, pimba nemelmomba temba wulprunnamba, wohkuvhoawol vev doaraminimomba.

**7** Osva verava, nomba doaraminimomba beswonamba pimba kilumbshuawol vetava, osva eva hengava manam nemelva oningvavmoa, owai.

**8** Wo heva os Sesoava doa nonglana, osva sahonam viv katindiva. Himba os ona,

Doa nambaiva mura prov, kava nonamba nemelva moamba vrevrava, nomba si luhunvav Israelnindm eva Yutanindm.

<sup>9</sup> Si osva owai, ora moamba, temba kava ovrahun-namba simbehumunilmba. Nomba nonam, kav kleiha iphovnam hem englana Isiprini. Wo heva os himba nomba pilpikovvna, wo kava noinda hemba meisva haravhueinvna.

<sup>10</sup> Wo dawonamba kava si nemel moamba wonishovav Israelnindm. Kava si velahéinvav kavna moamba hena mira, wo kav vera, si novol vewol vinvra hena indmera. Kava si einvav hena Sesoa, wo himba si avra katindi.

<sup>11</sup> Indhanamba si owalmba numhowol vivramoa hevna aratindimba, lihalmba kamba. Honamba memba, noinda indkumbiva si kamba liheiyav, eva snakolava avra, eva snamba bimbsnindva avrava yunalm, mongonamba si shamba lohvavmoa.

<sup>12</sup> Kava si maikumi vewol vevra hemba, noindava temba himba sahonamba vivrava. Kava hengava si oningvhunvavmoa hena indkoklamba.

*Jeremaia 31:31-34*

<sup>13</sup> Sesoava honamba moamba os ona nemel, wo honana himba doaraminimba weihaloh vrena kololalm. Wo manimani temba kololva lohnamba, andrava lohmanavmoa hengava hevnamba, doa hoai vilopiaiv.

## 9

*Sembayang Andranindna Kuwulva  
Doaraminiva, Nemetva Tatatovolna Sembayang  
Vinivna Sesoamba.*

<sup>1</sup> Hona mimirinina moamba, lohohmomba sembayangnamba lohv. Indhana englana vina nomba sembayangduvpa lairna.

<sup>2</sup> Noi mongal lairduvpa wohvina, kamarva sambla lohwolvna. Mimirini kamarva no lairduymerava, wo nomba kamarva os alvna, kamar kulohol. Wo diva merava noi nalohvna lampu, eva meya rotinahonam, noi ten Sesoana novsra nalohvnam.

<sup>3</sup> Wo meissisva kovopieinamba, mendekli kayen kiliheina, wo meissis mongo kamar lohvna, nomba os alvna, kamar kuloholnonoa.

<sup>4</sup> Wo diva no kamarrava noi nalohvna, golsengvva, nosram tinenalsowam vewuvulm, teihnung besalm pivialm. Eva osoa peti, nom himba hengava nengvhoalvhvna Sesoana lohohmomba, nunglivnamba nomba. Wo nomba petiva doara wohgothueina golna. Wo no petimerava honi yihlohvna, vena sospan golna, mana sungulvna, eva Aronna ala yithalohvna, alamba noi ten seilm nil wulphonam. Wo eva osoa diva merava honvava sambla, noi ten lohohmoa doaramini ten noinda novol velohwolvnam.

<sup>5</sup> Wo no petina kewulsrava ovsongolnindrini samblamsna elohwolvna, hevna angalalva mera evethawolvna nomba kewulva, diva temba Sesoava onamba, noindam tovolm sovhohola vawolm, Israelnindm nonam kilumb shuawolalm. Wo osva Sesoava si hemba hengava wusprunvavmoa hevna sahaposworava. Wo heva os kava manam eva ata temurava honamba popaiha vrevav detiva.

<sup>6</sup> Manimani diva no lairduymerava hona wevsana huhmoh vrina. Wo doa sembayang andranindva vesuv velvhvna no mimirini

kamarramba elsus sembayangmba.

<sup>7</sup> Wo mongona kamar kuloholnonoarava, sembayang andranindna kuwulangas vesihavevna, wo himba os velohvna no tahonnam mongawulm, no tahonnam mongawulm. Himba nisva vesihavevnamo, himba heva tovol longaisihavevhvna. Himba longraohvna nombatovolva Sesoam, vevna, hevm, eva indhanana indkoklam. Men nomba indkoklava indhana vivpa, osva nowolva vreivavmoa, osva kava memba indkokla viv.

<sup>8</sup> Sesoasongol honamba vrinv pimba, nethalmba, osmba nonamba nomba lairduvpa mendah lohvna, monamba owai lohvnamoa, osmba pivva saivra kamar kuloholnonoaramba, Sesoaindamba murapetamba.

<sup>9</sup> Honamba memba lihinv pim daipotamini, wo nomba os nungliv, manimani nis ambo wulpromnav, eva daipotava temba altasengrava wohwuweihimnivpa Sesoamba, owai, sembayangnindmba nomba hevmba kanandhowol vevavmoa, noinda hevpa os ningvav, osva kava mendah indkoklanahonam aevulv.

<sup>10</sup> Manara honamba lohohmomba ambo pimba numhowol vev nom, innem, pom, eva poram ahalalm, osm beswonam avra Sesoana novrava. Wo heva os lohohmomba nomba lohv ambo ambaram tovollam, undramba sihavmoa. Himba engalmba yunalmba vewuvav, verava, Sesoana nemel nambai phora, Kristusm sembayang vewuvmonalm.

*Sembayang Vivm Hona Nemelmona.*

**11** Wo heva os Kristusva doa prona sembayang andranindna kuwulalmsnamba, nom osm manimani besalangas pivva avpa nona huiya, temba Sesoava pimba nemelva moamba ovrahunnamba. No lairduyramsna himba sihanamba senamba, mendeklinonoa, wohkuvhoav doaramini lairduvmba petharinimba. Wo owai, indhanamba englanamba vinamoa, manara, eva hona petharinima, owai.

**12** Kristusva sihana Sesoaindamba mongawulmangas, wo himba englanamba lungi sihanamoia memena tovol, eva sapi otolna tovol, osva nemetva temba sembayang andranindna kuwulva velvohvnamba. Himba hevm hevna nihm kihopiana hevna tovolna. Himba sihana Sesoaindamba, pim kilumb shuawolalm, ambo osangas honaoa lotholohvra yunalm yunalm.

**13** Doarava os vivna, vevna, memena tovol, sapina tovol, sapi avalna somovtov velanglalna weihla vevna indhanam, nom ten sahonam avnam, wo honamba osm vinvna, henga besal nemel ara Sesoana novraoa, tovol velanglalnana nihraoa.

**14** Heva os Kristusna tovol henga mindnam wohkuvhoav nomba. Himba hevm nihnahnoram wohophona, wo Sesoasongolnapopol himba hevmba wuraohna Sesoamba, osva ona, kava men indhanarini besalnonoava. Noinda hena tovol si pimba kilumbshuawol vevav, wuvolalm alm Sesoana novra, vera undram eva ambara nihram. Wo pivva si osva beswonam sembayang vinivra Sesoamba, henomba wohavpa yunalm. Manara, pivva osva ningvavmoa, ora pimba indkoklanahonam av.

**15** Noinda Kristusva nemel wulprunna moamba Sesoanaminiva hevtindimba. Hindmba nomba temba Sesoava kekaiv venamba, doa hemba wohlundthoav awothowolnangas, os doara Sessa hev ten ovrahunnam. Honamba awothowolva si yunalm wohlohvav. Himba si os wohavav yunalm, manara, Kristusmba dahana, osm indhanamba temba avnamba doaraminimonamba, himba hemba si kilumbshuawol vevav.

**16** Sesoava nengavnangva os vrena, Kristusmsna dahara, wo os Sesoatindimba si awothowol vevav Sesoava. Yimba nonora av, osmba nonamba indhanariniva nengvrava, osva si kamba dahavav sewonamba, wo himba verava, tombaira novol vewol vevra, osmba henoi si vaohothovav manimani kanapuwulva. Wo doa no indhanariniva nengvrava, vaohotholmba, nomba manimani no henapuwulva, heoa hevmoa ambara vithinda indhanamoa indkumbim, osm aralva hona wohnamba doa tanam doara wohdahana.

**17** Tombaimomba nomba ombam ambo nonamba, osmba indhanariniva mendah lohvra. Honamba vivra, nonamangas hemba dahavrava sism.

**18** Osrata, tatamba luvnamba, wo tovolva longwol vivnamba. Hona monana himba seilva tumbuyulkohana doaraminimomba.

**19** Boasna Mosesva ishunna indhanamba, nomba yunalm moamba lohohmonamba. Hengava himba vravna sapi otolna tovol, wo yuhoh vrevna ponahonam. Wo doa hev vena, memetovol dombna, sipsiptal aembul, hisopklal tofovrena, noi velwohanamba, di tovolpora no velsongopona vena, lohohmom tombaim, eva

indhanam indkumbim velanglalna weihla vevna.

**20** Wo hev unna,

Honamba memba tovolva, honi seilva tumbuvulkohav moamba, memba Sesoava yemba wohtvpa, engalmба. *Kisim Bek 24:8*

**21** Wo eva osangasta ambo, Mosesva Sesoana lairduvmba tovolna velanglalna wena vevna, nonahonam manimani, ten noi mera di nalohvnam nomba sembayangduvmera.

**22** Manara, lohohmomba os ona, manimani besalangas lohvra tovolnana. Wo eva indkoklamba si osva undmisasa vewol vivramoa, tovolhuiva novnamba nonglalmba.

**23** Manimani memba honamba lairduv sembayangnamba ambo nom lehvrowol vev, nom ten nalohvm senakembella, wo beswonaman-gas vewol vivna tatatovlnamba. Wo heva os manimani nomba temba senakembelliniva, ten lehrava lohv, heva noi besal lohvra tovolnonoana, wo henga nomba kuvhoavra tatatovolmba.

**24** Kristusva sihamba owai vena kulohol vuheramba, indhana hev englana vinamba hona petharava. Himba sihavongo vena senakembellangas. Heva os himba doa daipotava di av Sesoana novra, pim kolvwolalm.

**25** Sembayang andranindna kuwulangas vesiba velohvna no kuloholnonoarava huiva petharava, os no tahonnam mongawulm. Himba longaisiha velohvna tovol, nomba tovolva hevnamba owai. Wo heva os Kristusva vonganamba senamba, himba hevmba wuraohowovnamoa Sesoamba el-susva.

**26** Himba osva vetava, ata himba elsus kinmba guamona vevta, doara doa pethava os vena, ve-

namba, daipota men. Wo heva os doa Kristusva mongawulmangas prona. Himba ambo lehra hona nambainam prona, pimba kilumb shua-wolalm. Himba hevmba pimba ophunna, dahalm pina indkoklam poswol vinilm. Manara, doa murapeta vev, ovi pethaiva imhara evhowolalmba.

<sup>27</sup> Indhanamba indakonda dalv. Sismba osva indhanarinimba dahavrava, hemba nomba we-tatmora lesvhueivra.

<sup>28</sup> Wo eva osta Kristusva himba hevmba mongawulm holvoraohna Sesoamba nihnahanam, indhanana indkoklam poswol vinilm. Wo himba henga si sismba provav, heva os indkoklamba poswol vinilmaba owai. Himba si provavpa hengava, wohlopshalm, nom ten henoi nengvilivm hem.

## 10

### *Kristus Pimba Kilumbshuawol Vena.*

<sup>1</sup> Lohohmorava ambo pimba naengho vriv aenisongolmsna, nomba manimani si besalva phovavpa sewonamba Kristusnanamba. Heva os lohohmomba mani nihnamolnamma, osva ora, noi pimba si kilumbshuawol vevav. Pimba wiyeria av, manara, indhanamba nomba temba hona lohohmosingiva avnamba, no mongawa wevsana tatamba weisang velvohvna, weisumblololmba, no tahonnam no tahonnam osangas. Wo no tatasowamba Sesoamba venalmba, kilumbshuawol venamoa, nomba temba muramba ambnamba, sembayang venalmba Sesoamba.

<sup>2</sup> No lohohmomba hemba kilumbshuawol vetava, nomba tatasowava Sesoamba venalmba, si os wohkik vevav, heva os owai.

Sembayangnindmba hemba si kilumbshuawol vevav, wo himba si ningvramoa, osva kava indkoklanahonam mendah av, heva os owai.

<sup>3</sup> Heva os owai, mendah noi tatasowava viv, wo noinda himba henga nengvhoalvohipinv hevna indkoklam no tahonnam, no tahonnam.

<sup>4</sup> Manara, owainonoa, es eva memena sapiar-alna tovolva indhanamba kilumb shuawol vevav, osm indhana windel Sesoana novrava.

<sup>5</sup> Noinda osva nonamba Kristusva provnamba petharamba, hev omnana Sesoam,

Yimba nengvmoa, osva tata lu, noi kam wuwei-himnu, weisumblololm suwera. Yimba nengvmoa, osva kam dambroh vivm innenna.

Heva yimba kam kikih vrena nihm, yem engalm.

<sup>6</sup> Tanam, yimba indk vithinvmoa, osva tatamba suweramba wohwuweihimnilmba, wo eva nonamba indhanamba kilumbshuawol velmba indkoklariniva

<sup>7</sup> Heva os kava os ona, Seso, nonglo, kava men prov. Men novol velohv kamomba tombaira,

Kana Seso, kava doa prona, velmba, nomba yimba temba nengvpa. *Buk Song 40:6-8*

<sup>8</sup> Hona doaramini Sesoana tombaimorava, himba seilmba os oi, yimba nengvmoa, osmba tataoa kamo suweramo wohwuweihimnu, eva innennaoa kam dembraho. Yimba nengvmoa, suweramba sengalmba, nonamba indhanamba kilumbshuawol velmba. Honamba andrava memba Mosesna lohohmona moara, heva os Kristusva doa nemelm pulphona wevsava.

**9** Wo eva hev henga onam, men kava. Kava doa prona, velmba, nomba yimba temba undva vrevpa.

Men osm, pimba daipota hona moara lingilli-heiv, Sesoava doa wohnombolvhoana doaramini wevsamba, nomba manimani temba suwerava wohwuweihivnamba. Osm vena, himba henga nemelm pulphovna wevsava.

**10** Yesus Kristusva wohvena, nomba temba Sesoava nengmanavnamba, hemba velmba. Wo noinda honamba pimba kilumbshuawol vena, osm Sesoanangas avra, hevm he ophonam nihnahonam. Kristusva hona andrava vena mongawulm, wo yunalm wohloholm.

**11** Kivrahui sembayang andranindva viv, hevna andrava elnitra viv elsusva. Vivpa, henga vivpa, os manimani suwerava wohwuweihimniv Sesoamba. Wo heva os no manimani temba vivpa, owainonoa, indhanamba kilumbshuawol vevnamoa.

**12** Wo heva os Kristusva hevm kihopiana nihnahonam mongawulm indkoklaramba, osm si noi yunalmba eukwonamba lohvav, indhanamba kolvrowolalmba. Wo doa himba av Sesoana nihananglasis.

**13** Wo daipotava Kristusva di nengvewolowov, osm Sesoa aral hena ungundmba si slowothovav hena englisram.

**14** Kristusva mongawulm dahana, wo hona monana himba kekaiv vena, wuvolwonam alm yunalm, nom ten avnam Sesoanangas.

**15** Sesoasongolva eva ishunnata pimba honamba. Seilmba himba os ona,

**16** Mendekliva os ona, dawonamba sewonamba kava si honi wonomokalthavav nemelmomba Israelnindmba. Kava kavna moamba si yihinvra hena indmera, wo kav si novol vewol vinvra hena mira. *Jeremaia 31:33*

**17** Wo henga hev ona, Hevna indkokla, eva manimani noi sahoklal hev vivnam, ata kava nengvavmoa nombamonglamba. *Jeremaia 31:34*

**18** Doa indkoklamba Sesoava maikumi vewol vena, noinda hengava vivavmoa andrava, indhanamba kilumb shuawolalmaba.

### *Osangas Keknam Wohamnavm Sesoamoa.*

**19** Seh, Sesoava doa pimba kilumbshuawol wohvena, noinda daipotava pivva wuvolva av, saivomangas Sesoana kulohol vuheram. Yimba honamba vivra pepehhuiva, manara noinda Yesusna tovol dahallinira.

**20** Pivva manapenam saivvav nemelmonana, nona ten Yesus velevhueinnam pim, hona monanam yunalm wohalm. Honamba nemelmonamba wohdihelsihangav no kayenmeram, nomba kayenmba ten lengkleiha lohvpa no vuhenatuvmsna. Nomba kayenmba Yesusna nihm woholhv.

**21** Wo pinamba sembayang andranindriniva mendeklimsna luhunv Sesoatindinamba.

**22** Wo doa pioa muram apelpawohara, keknam undnahonam amnalm. Manara, pimba doa windelangas av, tovol velanglalnana. Noinda pivva osva ningvavmoa, pinamba indkoklava luhungu vinv. Wo pina nihva doa poswol vina po dendaalna.

**23** Pivva eisholohv pivna undm, eva pivna manam manam besalm, nom men piv nengviluwuvm. Manam pimba pemba mumusva angavra. Pimba nonora av, manam manam Sesoava doa ona, velmba, tanamolnam himba wohhev.

*Pioa Keknam Nengmanalohra, Velm, Nom Hev Ten Wohonam.*

**24** Pioa longong vewol velohra nom, osm hem nom, hem nom, eva kolvrowol velm hem, osm os und avramana vevm hem nom, hem nom, wo eva vivm beswonamangas.

**25** Manam yimba pevmba ollavav, nonamba kusovpa owapevpa, sembayang velmba, osva temba indhanamba monglava vivpa. Wo heva os yeoa mongawatilm kusovm, wo eishoraohv monglamoa, keknam alm. Vewuvmona vevm honaoa elsus osangas, manara, yimba nonora av, nambaiva mendah ten prov mendeklinamba.

**26** Pimba doa numhowol vina moanonoanamba, wo pivva sahonamba allava hengava, owai, hengava lohvmoa monamba, pimba kilumbshuawol velmba.

**27** Owai, lohvmoa, heva os pem viu, aevul-manalmba wetatmomba, eva suwekoklam, noi ten si muhawol vevm hindm, nom ten he ahnam lovahwolv m Sesoa mongo.

**28** Yimba nonora av, himba nomba nengvmoa, engalmba Mosesna lohohmomba, nunglivna, himba indkokla vev, wo muserava os nunglivna sambla indhanaka, samblamong indhanaka. Wo hemb a manam wavra vrivra, hemoa wohhelvakomandhivm.

**29** Wo noinda es yimba ningv, vinvrama indhanamba, nomba himba temba Sesoana ombolmba ningminivmoa? Himba nungliv tovolm Kristusnamba, nom ten lehvavrm Sesoana moam nemelm. Noi tovolva hemba doa nemelalm nilheinna, heva os himba nungliv, os indhanarinina tovolnonoa. Wo osva himba indkokla vrevna Sesoasongolm, noi ten pim wavra vovhueinvm. Tanam himba si vravav mendeklinonoa kinmba.

**30** Pivva nonora av, Sesoava os ona,  
Kava si bui vowel vevav, nomba temba tetevul  
vrivpa. Kava si esesm vinvav hemba.  
Wo hev vena, os ona, mendekliva si  
hevtindimba lesvhoawol vevav. **Lo  
32:35-36**

**31** Indhanarinimba wetatmorava waiishovrava mendekliva, wo himba si pemba esvema vevra nonamba, Sesoanapenamba, ten wohavm yu-nalm.

**32** Heva os yeoa ningvm nom nambaim doaraminim, nona seilm pev ten avnam hona moanonoana. Nonamba yeindamba kinmba esvema oprinvna, wo yemba mindnam al mangtomosa vrevna. Wo heva os yimba lo bombothoprana, honamba kinmba levralmba.

**33** Mongnanamba yemba vevna, velanongla vowel ovuvna indmosera. Wo mongnanamba yimba wonvivna pevna mongawa Kristusindm, himba eva sna kinmba doa dumbnata.

**34** Wo osva temba yimba kolvrowol vivna indhanam buinindm, pevna mongawa Kristusindmba, wo yimba doa losnamona avna, noindava manimani yimba temba ianamba, wo doa yenaminiva vrepiana. Manara, yimba

ningvna, os kanamba manimani besalva si nalohvav yunalm yunalm, mueisowa vepehui senakembellava.

<sup>35</sup> Wo noinda osva manam yimba maivithivra nengavnangva, nomba yimba temba seilmba engivnamba. Mendekli lohv, yemba esesmba vinilmiba hona andrarava.

<sup>36</sup> Yeo wohkek vithu, wo yimba osva nomba beswonam vivra, Sesoava temba nengvpa. Wo osva yimba dombolvav, nomba hevpa temba wohonamba.

<sup>37</sup> Manara, os novol velohv,  
Mani wenokombawonamma, mongova temba prolmiba vevpa, si provav. Himba si wenokombo vevavmoa.

<sup>38</sup> Indhanariniva nomba temba kava nonglavpa, osva lehrangas av, si himba beswonam avav. Manara, himba keknam undnahonam amnav kamba. Wo heva os himba pepeh vetava, wo henga mumus gavra, kava si indk vethamnavavmoa hemba.

*Habakuk*

*2:3-4*

<sup>39</sup> Wo heva os pimba snamba owai, temba himba pepehva vevpa, wo owolakohav. Pivva indhana, noi keknam undnahonam si avavm, noi si wohlopshavavm.

## 11

### *Undnahonana Plalva Mani?*

<sup>1</sup> Undnahonamba osm uv, keknam amnavm manam manam, nom ten piv ningvm, Sesoa ten hev ovrahunnam pim. Wo undnahonam vei, osm levrapivolalm, nom manam manam, ten piv novna nonglam owai vivm, nihnamolnonoam.

<sup>2</sup> Indhanamba nemetva temba anamba,  
Sesoava indk vethinvna hemba, manara noinda  
keknam undnahonam avnam.

<sup>3</sup> Pivna undnahonara pivva nonora av nomba,  
osva vavawonamba pethava lohv Sesoana moara.  
Honamba memba, osm nomba pimba nunglivpa,  
vena mana vemana, es eva nunglivav.

<sup>4</sup> Apelva keknam undnahonam lohmanavna  
Sesoamba, wo himba Sesoam tata wohwuwei-  
hamnavna, nonam sembayang venalm. Wo  
Sesoamba wohkanandhavna nihnahonam  
Apelna tatasowarava. Wo heva os Sesoava  
Keinnamba puehalla velahavna innesowamba.  
Manara, Keinva hemba undnahonam  
lohmanavnamoa. Wo honinda pivva osva  
wiyera av, Sesoava Apelmba os omnana, besal  
indhanarini. Apelmba doa doara dahana, heva os  
hena wevsava mendah pimba numhowol vawov.

<sup>5</sup> Hevna undnahonara waivolna Enokmba  
senakembellamba. Hemba dahavavmoa. Wo  
hemba si nunglivavmoa, manara noinda Sesoava  
hemba doa waiwohgana. Hemba os waingana,  
Sesoana doaramini tombaimomba os ona, himba  
indhanarini, he doara vawovna, osmba Sesoava  
und kanandhav.

<sup>6</sup> Heva os undnahonahuirava, an eva vrevav  
Sesoamba, osva noinda undoa lothora, owai.  
Himba nomba prolmба vevrava Sesoaindamba,  
undnahonam keknam lohvra, wo himba keknam  
nengvra, osva Sesoava beswonamangas vowel  
vinv indhanamba, nomba temba hemba aslalvpa.

<sup>7</sup> Hevna undnahonara Noava hellena Sesoana  
ongawolmomba nomba, osva manam manam  
mendah nonglavmoa. Himba wohengvna

Sesoamba, wo bot mendekliva kueindinvna hevna ongatowondalmba, hemba lopshalmба. Osва himba museram amballam pethanindna wevsam wulphunvna, osва doa sahoklal av. Wo hevna undnahonarava, himba nilhavna sna indhanarinielm, ten lehrangas lohvm Sesoana novra.

<sup>8</sup> Aprahamba keknam undnahonam lohmanavna Sesoamba, wo mongawa aong hellena, mongona petharamba galmba domba, Sesoava temba doarava wohomnanamba, vraholmba. Himba hevna pethamba wuleihalahaphona, himba hevpa mendah tit vevna, osmba hem kava gav?

<sup>9</sup> Heva os ambo undnahonara osва himba avna no petharava, Sesoa doara wohomnanam, wohvraholt. Himba diva os avna, ovna, ilonindrini, kembelnindrini owai. Himba avna lairduvra, wonavna Yakopim Isakim, himba eva noi mongawamoа evrena Sesoanamba, pethamomba.

<sup>10</sup> Aprahamba keknam undnahonam wohnengvelowovna kota mendeklim, si noi wohlohvav yunalmba, nom Sesoava doara vena, nengavnang vrena, wo osoa eva doa wohvena nombा.

<sup>11</sup> Hemba doa mundkola vevna otolhui, wo Saramba eva osta, snal eva ata otol lengla veta, owai. Wo Aprahamba hevna undnahonara Sesoava vrena, osм keknam loholm aralm. Manara, himba keknam nengmanavna Sesoamba, venalm, nom hev ten waiishovnam.

<sup>12</sup> Hona indhanariniva mundkolalnonoa, doa hemba mura dahalmba vevna, wo heva os

henamini phovna esvemava simbepolva, osva memba paiva ovrava lohvpa. Himba os av, os men engal, an eva sevelvav si, owai.

<sup>13</sup> Honamba indhanamba himba keknam undnahonam amnavna Sesoomba, wo hemba os sihana. Himba dumbnamoa hona petharava, nomba temba Sesoava ovrahunnamba hevtindimba. Wo heva os himba os ningvna, kavna manimani si sewonam dawonam naluhunvav senakembellava, wo os indk vithivna. Himba os una, kava hona pethanindva owai, kava ilonindmsna ahalloholnindmsna av huiva.

<sup>14</sup> Nonamba indhanamba sna moamba eishovpa, wo pimba nungliv, osva himba aslalv petham os hevelm, no pethava wohdihelinvav.

<sup>15</sup> Himba hengava ningtava hona pethamba, himba henga lelga veta, heva os owai.

<sup>16</sup> Wo heva os no indhanamba temba nengviliv besal kembelmba, senakembel. Noinda Sesoava louva vevmoa, osva sevra ovriypa hemba, kana Sesoa. Himba doa pongvhueinna kembelmba hemba.

<sup>17-18</sup> Sesoava Aprahamba os omnana, simbepolva yenamba si phovav Isaknaminingas. Heva os sisumba Sesoava Aprahamba lehmanavna, osm ora kamba keknam undnahonam ambo tanam lohmanav? Hev omnana, yeoa pevna ombpovmoa mongawa powolamo a wohweisumblowom-nora kam suwera. Wo Aprahamba osm ona velm vena, ten Sesoa omnana.

<sup>19</sup> Aprahamba keknam undnahonam os lohvna, Sesoava si pokamariniva henga wolaihaphovav hemba. Wo heva os Sesoava henga ollana hemba,

hevna ombolmba kovhoalmba. Noinda pimba olhmonamba olhinv, osva tanam Aprahamba hevna ombolmba pokamarinimsna omnana hengava.

**20** Undnahonarata nomba temba Isakya awothowolnamba, luhunilmba Yakopi Esauimba sewonamba.

**21** Yakoppa undnahonam keknam lohvnamba, osra himba awothowolna Yosepna ombolsambamba. Himba honamba nonam vinna, hevm dahavnam. Wo doa hevna alasra ku holothonamba, Sesoam sembayang venavna.

**22** Wo hevna undnahonara Yoseppa ishunvna Israelnindmba owalmiba, osva yimba si pulvovav hona Isippethariniva, nonam ongopievnam eu-nillam. Himba ishunvna hemba, osm, os viu kana keloa.

**23** Hevna undnahonara Mosesna araravalva elengkomandhana hemba samblamong weisramba, os nonam lingvinam. Os enonglavnamba, besal hevm lingilv otolva. Wo himba pemba evevnamoa, king kuwulna moamba pilpikoholmba, nomba himba temba doarava wohtvnamba, helvakomo vewuvulmba tuendismba.

**24** Wo hevna undnahonarata Mosesva lohna, os venamba, mendekliva venamba, ovunna, kamba sevra ovrilmiba, osva king kuwulna molna ombol, Isipnindna.

**25** Osva himba hevmba pusvundthoana, kinm wongoalm Sesoatindimongom, galmoa lohna monakoklaramoa. Himba nengvnamoa, wevs sahoklalmba engalmba, wo nomba osmba ambo daipotamangas deswuhavra.

**26** Hev nengna, besalva men loum vralm Kris-tusnam, eva dombolm wohm besalm Isipnind-nam, owai. Manara, himba nomangas nengvnam, manimani ten Sesoa dembraholm vevm hevm.

**27** Wo hevna undnahonarata Mosesva phona Isipriniva. Himba nengnamoa nomba king kuwulna daosmomba. Doa mongova nonglanamo Sesoamba, heva os Mosesva keknam andrava wohvevna, os maim ovna, himba doa nonglana hevna novna Sesoamba.

**28** Wo hevna undnahonara Mosesva laus vrevna Pasovatihmba, wo unna Israelnindm, yeoa tu-vmoa tovol velanglalna vinu. Memba osm vevna, ovsongolnindrini himba nomba sihavrava, ata helvakomo vevramoa yivaltowondmba Israelnindnamba.

**29** Undnahonam avna, noinda Wan Aembulmba lovol vena, os maim ona, petha monam. Isip-nindva eva himba lehalm vivnata, heva os owai, hemba nepola vilona.

**30** Undnahonam Israelnindva keknam avnam, nomba pueilva Yerikoriniva os tetga vina. Seilmba boasna himba angavnamba, weisming vruwuvna amballava, mongawa mingu osva venamba, honpul noi tetga vepe na petharam.

**31** Hev undnahonam avna, Rahappa, himba monarini ambo avna, himba beswonam pepavena nongendwolnindrini samblamba, wo hemba helvakomandhinamoa no indhanahanonamba, temba Sesoamba engamba owai vivnamba.

**32** Hengava kava yemba monglamba moamba ishunvavma? Kanamba mindnamba nambaiva

olohvmoa, yemba ishunilmba honamba, vei Giteon, vei Barak, Samson, Yepta, Devit, Samuel eva moashulnind.

<sup>33</sup> Hevna undnahonara himba daosva ohomana vevna, osva hindmongo, hindmongo, wo hengas snapolmoa kuvhoawol vina. Himba noi vivna, ovna, memba lehra, wo osoa dumbvna, nomba Sesoava temba ishunnamba. Himba laionna lomengmba kulthoawol vinvna,

<sup>34</sup> suwem mendeklim vuthoawol vivna, wo beswonam eva ahallohvna ovlakasnapenamba. Hemba oi vilovna, wo heva os henga kepel vovhoapravna. Diva himba daosva keknamangas ohovna ungundmongova, engilangavna.

<sup>35</sup> Heva os monglava indhanamba dalvna, henga phosohvna, wo os hena avahumunilva hemba henga wulengu vevna. Monglava nengnam ambo nunguth vewol vivna, unvna, yeoa Sesoamo nombolvhueiu. Ata yemba kava osrava nombolvhueivav beswonam. Heva os owai, himba ningvnamoa nomba. Manara noinda himba ningvna, kava si henga mindilva kavna nihna phosohvra beswonam.

<sup>36</sup> Wo monglava losgoplala unvna, wo helvawol vivna. Monglamba wena ningewol vivnamba, buira wolasuv vevna.

<sup>37</sup> Wo monglamba honna helvakomo vivna, wo monglamba hovrahovra kokowol vildavna. Hem vevna, ovlakasna helvakomo vivna. Monglava sipsipna memena tovol vevravna pikianalmba, noinda mani ata ovrivta. Himba innehuinind, hemba indkokla vewol vivna.

<sup>38</sup> Pethanindva beswonamba hemba nungeilvnamoa, heva os Sesoana novrava he miva lo-

vahv. Himba ambo ahallohvna, os sahalpetham, oloram, honmeram dom euvmona velm, eva pethameram.

<sup>39</sup> Nomba indkumbiva indhanamba, undnahonamba temba amnavnamba Sesoamba, wo himba dumbvna besal nihilva Sesoana novrava. Wo heva os heriniva mongova vranamo, nomba temba Sesoava unnamba, mendah.

<sup>40</sup> Manara, Sesoava nengavnangva vrena, mana vemam daswolalm pimba besalmangasm. Wo himba si avav beswonam, wo heva os pimongo mongawulm, Kristusindava.

## 12

### *Yeo Naongla Vrivm Yesusmoa, Wo Wohvivm.*

<sup>1</sup> Pimba best eva indhanamba nunglulavma, pimba doa pulningewol vina, wo himba pimba titihowol ovuv. Himba nomba temba doaraya keknamba undnahonamba avnamba. Noinda hena wevsava eishunv pimba nom, osm, undnahonamba osm uv. Wo noinda pioa eva dandwonam angalohvra, no monaramoa, Sesoava pimba temba unnamba, alhmana velmba no monaramba, wo eva kivrawuliha vrivramoa. Wo noinda osva pioa wuleihalohra mana vemakoklava, temba pimba kekaiv vevpa, ata osva pivva dandwonamba angavavmoa. Wo pimba osva beswonam tingeswulvra pivna indkoklamba, nomba temba pimba kekaiv vevpa hengava.

<sup>2</sup> Pioa ambo naongla vrelohra Yesusmangas. He pinamba keknamba undnahonamba almba sonovhueinna, wo himba pimba vinvna, osm

keknam ara hevna velgona. Yesusva kinmba guana, krusera wikleihivnam. Wo heva os himba wohvravna louva krusesrava senamba louhui. Manara, himba nengna, ona, Sesoava si kamba indk vethalmba vraohvav sewonam. Wo daipotava himba Sesoana nihanasis king kuwulna vuheramsna av.

<sup>3</sup> Ningminivm Yesusmangas. Himba nengnamoa nomba, nonamba indhanakoklava sahonamba indkoklawonamba hemba vinivnamba. Nunglivm Yesusna wevsam, osm yimba si nona keknamba avra, eva mana vemava yemba wiki vewol vevra.

### *Sesoava Snal, Oi Ara.*

<sup>4</sup> Yimba pevna indkoklamba wuleihalm viv. Noinda kava olhmomba olhv, osva yimba pevna indkoklamongo daos ohov. Heva os hona daosrava yenamba doava yemba mongova dahavmoa, osva tovolva pihavmoa.

<sup>5</sup> Yimba doa maivethakovna Sesoa arana moamba, yemba suwenamandna vewol ovolmba, Kana towand, manam yimba ningvav, osva mendeklina moamba, novnavhoramba velmba, ambo ombam, owai. Wo manam yimba wuleihivav, lehawuvulmba, nonamba Sesoava yemba sishona vewol vevpa.

<sup>6</sup> Manara noinda mendekliva sishona vewol vev, nom hev ten keknam und vewol vevm. Wo himba bui vewol vev indkumbimba, nomba himba temba unvpa, hevtindilmба. *Sindaun 3:11-12*

<sup>7</sup> Wohdumbvm pevna kinoa, os maim uvra, arahumunpev yem ten vinvram. Sesoa honamba manam manam vinv yemba, os oi, aral vinv

hevna otovotalm. Otovotalmba hevna arahumunilva bui velahav.

<sup>8</sup> Otovotalmba yunalm wohbui velahavm. Yemba bui vewolalmба owai vetava, yimba besalva tanamba otovotalva owai, yimba maim oi, timingrini.

<sup>9</sup> Pivva huiva petharava avpa, ararangas he pimba bui velahav. Wo pimba pivna aramba beswonam longong vewol viv. Wo noinda osva memba mendekli, nomba buimba pimba vralmba pivna aranamba senaminirininamba. Pimba honamba osva vellava, pimba si osva undna avav.

<sup>10</sup> Pina arahumunmba honamba pethariniva bui vewol viv pimba, nonam piv eusil mendah ahalvm. Himba pimba nona bui vewol viv, hev ten os ningvm, memba besal honamba. Wo heva os Sesoava pimba bui vewol vevpa, pim kolvrowolalm, osm pimba osva avav helmangas besalangas, os hev ten avm.

<sup>11</sup> Pimba und vivmoa buimba. Buiramba lilmba nihsesoa vev. Wo heva os sewonamba sismba pimba sungeipilalga vevra buiriniva, pivva avav beswonam, manara, pimba doa kovohlavra, beswonam alm besal monam.

### *Vivm Novnavhora, Es Yimba Av.*

<sup>12</sup> Buiramba lilmba besal, manara, monglava yemba doa oi vehawol vena. Keknam kel wosapro pevna henga.

<sup>13</sup> Wo avm besalmonam, osm yemba si lopshawol vevav, wo oiva nomba yenamba si yemba kekaiv vevavmoa, owolakovolmba.

<sup>14</sup> Lihvm, beswonamangasm alm indkumbimongom, wo eva viu, lihvm, alm Sesoalmangas. Henomba Sesoalmangasva beswonamba lohmba owai vevrava, himba si owaimomolmba nonglavavmoa mendeklimba.

<sup>15</sup> Pevmoa novnavhora vivm, ata mongo indkokla vevra, wo noinda himba Sesoana wavrava ata homeis nengvramoa. Indhanariniva lohollava snamba, himba si yemba monglamba wohindkokla vewol vevav.

<sup>16</sup> Novnavhora vivm, ata anvema nihtov kovopethavav ongariskuira. Novnavhora vivm, ata mongo ora vevai, os ten Esau nemet venam, os Sesoamba nengmanavnamoa. Esauva etel, wo manimani he vaohothovav hevna aralnamba. Wo heva os Esauva hevna boasalalm Yakomp omnana, ye daha pivna aranapuwuloa vaohotho, kava owai. Wo Yakoppa hemba no nungnam inne dembrahona, nonam nelm mongawulm.

<sup>17</sup> Yimba nonora av nom, osm sismba Esauva honamba vena, himba nengvna, dombolm aranapuwulm. Himba nengvna honamba mindnam, wo wovevna, noinda himba os nengloh venamba, nom weihaloh vrelm, hev ten venam, heva os owai.

### *Pimba Indkumbiva Sesoana Yivaltowondmsna Av.*

<sup>18</sup> Pimba senakembellam angav, Sainai oloramba owai, osva temba pina tomonalva vinamba nemetva. Yimba vonganamoa oloramba, osmba yimba pevna englana tuhvav, wo nomba yunam suwe telahavna. Yimba doava sikulmerava saivnamoa, temba wohkilvralohvpa, eva vuvi mendeklirava. Pina

tomonalna wevsra, himba os pulvona Sainai olorava, Sesoamba hellelmba. Heva os pimba owai daipotava.

<sup>19</sup> Himba vuvm hillivna Sesoanam. Nonamba himba hillivnamba weitva, himba nonakulm wohhillivna Sesoana moalamangmba, wo himba pemba os vivna, i. Hev Mosesm umnina, es, Sesoam os omno, kava hellelmba vivmoa hemba.

<sup>20</sup> Himba ningvnamoa, moamba nomba hellelmba. Osva indhanariniva tuhvrava olomba, hem nomoa wohmiklivm honnangas, eva tatamba osoa osta.

<sup>21</sup> Mana vemamba himba temba nunglinamba, sahoklalnonoa, os Mosesva ona, kava pem venamba, kamba woheisna.

<sup>22</sup> Wo heva os yimba ambvmoa sna olorava. Nemel olomba memba yimba ambvpa, olo Saion. Yimba doa ambv Sesoana mendeklikembel Yerusalem, di dihely senakembella, Sesoava ten noi yunalm wohavm. Yimba dom ambv, di 1,000pelara ovsongolnind kusovnam mongawulm indwonamangas.

<sup>23</sup> Yimba doa eksuwulprana Sesoana yivaltowondna moaramba. Hena nonamba nihilva di novol veluhunv senakembella. Yimba doa ambna, domba temba Sesoava no vuherava lesvhoawol vawovpa indkumbimba. Wo ye vena, doa ambna besal indhana songoramba, hem ten Sesoa doa lesvhoawol venam, unna, yimba indhana windel. Wo noinda doa himba beswonam av.

<sup>24</sup> Manara, yimba doa pepavena nihra Yesusinda, henoi ten nemelmoa wulprunnam Sesoanamini hevtindim. Yimba doa saivna

Yesusna tovol velanglallava, wo no tovolmerava Sesoava moamba besal ishunv pimba, wavramom. Snamba owai, temba Sesoava Apelna tovolmerava ishunnamba, esesmba.

*Pioa Sesoana Das Owolmomoa Hellelohra.*

**25** Wo doa novnavhora vivm, manam yimba aongva nukun vewol vivra, nonamba Sesoava ishovrava. Tomonalva kongswul vevna, hellelmba hemba, nonamba Sesoava hemba ongawolvnamba petharava. Wo Sesoava kinmba plothunna hemba. Daipotava Sesoava ongawolvna pimba senamini. Osrava mana vema si pimba ongolohvav, pivva aongva nukun vewol vitava, pimba si esvema vinvra kinmba.

**26** Nemetva nonamba himba ishovnamba, hena moarava pethava daihavna. Wo heva os daipotava himba doa moamba ishona,

Henga kava si vevav, osva pethamangasmba owai, daihavavmoa, ovnahonam daihara.

*Hagai 2:6*

**27** Hona moamba henga pimba novpa wuleihinv, nomba manam manam temba venamba, si daihaprarava, wo hoai vilovav. Osra manimani nomba si daihapramba owai vellava, nongas si wohlohvav beswonamba. Manara, Sesoa hev kekaiv viav.

**28** Wo noinda osva pioa olohmanara, os, yimba lehra, manara noinda pimba si wohavav Sesoana nemeltindirava, osm noindava indkokla vilovavmoa, hoai vilovavmoa. Pioa sembayang vewuvmona velohmanara Sesoamoa, no monana himba ambo und kanandhavra. Pioa hemoa okolalohra longongnahonam pepehnahonam.

<sup>29</sup> Manara noinda pivna Sesoava snal av, maim oi, suwe tav, noi ten manam manam wohtelahvm.

## 13

### *Pioa Indakonda Nesmos Avramana Velohra Pivmoa.*

<sup>1</sup> Yimba Kristusnindva, yeoa nesmos avramana vevm henom henom mongawa pendarinimsna Kristusnind.

<sup>2</sup> Ningvm, deisumbisuv velm ilorinim pevna deuvram. Monglava indhanamba doa vina honamba, deisumbisuv vena ovsongolnindmba maim titnam.

<sup>3</sup> Manam yimba numbulpav, nomba temba buimerava aevulvpa. Nengewuvunvm hemoa, os ovra, kava kav aevulv buimerava mongawulm. Ninginvm hem nom, ungund ten indkokla vewol vivm, os ovra, kamba eva osta indkokla vewol vivta.

<sup>4</sup> Organungmoa longong vrivra indkumbioa. Tlal ongal hevna evrowolalmoa, hengava manam emuksawoksava evevav. Sesoava sesm si vinvav hindmba, nomba temba iaindavpa ongariskuirava.

<sup>5</sup> Pevna almoa beswonam sungiavhoapro, dimba muemb hlalmba. Wo nona yemoa wohkanandhawol vevra, ten pev noi wulavm. Sesoava os ona,

Kava si yemba nombolvramoa, kava si yemba mai vevramoa. *Lo 31:6*

<sup>6</sup> Wo pivva osva ningv, tanam, wo uvra, Kava si pemba vivramoa, manara noinda mendekli kamba kolvravra, indhanamba

mana vemava kamba vinivrava. *Buk Song 118:6*

**7** Ninginvm pevna mundilm mendeklim. Himba numhowol vivna yemba Sesoana moana. Ninginvm, es himba avna, wo es hemba sihavna, wo hena undnahonam alm ninginvrava, os ao yeoa evata.

**8** Yesus Kristusva eva osta luhunv pimba, om, detim, wo osangas yunalm.

**9** Manam yimba nihva wuleihinvav indhanamba, yemba numhowolalmba monakoklaramba. Yenaoa indoa wohlovahinvra keknamangas, Sesoana wavranangas, innena wevsamba hlalmba owai. Snamba engalmba lohohmomba, owainonoa, mongomba indhanarinimba kolrvavavmoa.

**10** Pinamba luhunv altasengmsna, memba Yesus hev. Wo heva os Yutanindna sembayang andranindva, himba nomba andra vevpa no lair sembayangduvmerava, himba nevavmoa nominiva hevpa. Memba olhmomba olhinv pimba, osm Kristusva hevm wuraohna, dahalmba pina indkoklaram. Wo honi henga wohkuvhueinna Yutanindna tatasowamba.

**11** Yimba nonora av, kuwul sembayang andranindna tata tovolva longaisiha vev domba meramba kuloholnonoa vuheramba. Wo di himba dembhannav Sesoamba, indhanamba kilumb shuawolalmba. Wo heva os nomba nihilva di ambara wohweisumbololowov ehalla.

**12** Wo eva Yesusva os wukleihinata amballa ko-tara Yerusalemrava. Hemba dahana, hevtindim Sesoalmangas alm hevna tovolnanam.

**13** Wo noinda osva eva pioa hem patvlohma-

nara elsus, loum vramnalm henam. Pioa eva os  
vralohrata mongawatovna, Yesus ten vranam.

<sup>14</sup> Manara, huiva petharava pinamba luhun-  
vmoa, yunalmba dihelalmba kotava. Heva os  
pimba aslalv kotamba nomba, osmba sewon-  
amba noi si pimba yunalmba wulaevvav.

<sup>15</sup> Wo noinda osva elsusoa pioa Sesoam oku-  
luvmona velohra. Memba pivna okolal phunv  
pivna moarini, ten piv sevra ovrivm hem, os  
Yesusva mendekli lohv. Memba pina Kristus-  
nindna tatasowamsnamba luhunv.

<sup>16</sup> Manam yimba maivithivav, beswonamba  
vinilmba mongnindmba. Wo wonamong vevm  
hemoa, yimba nomba iaevulvrava. Hona wevsara  
Sesoava indk vethav.

<sup>17</sup> Wohengalvohmana vevm pevna mundil  
mendeklimoa, wo ambo vinvm hena keusingi  
taiwwonam. Hona indhanamba novna vewol  
viv yemba, noinda hena andrava luhunv, yena  
indmba novna vewol vinilmba. Wo Sesoava si  
henamba lesvhoawol vinvav. Wohhilwulvm  
hemoa, osm himba wohvivra hona andrava  
indwonam, duuswonamba owai. Si yemba owai  
honamba kolvrowol vevavmoa, yimba kinmba  
hemba pelhola ovunvrava.

<sup>18</sup> Wohvewuvunvm sembayangnaoa kamoa.  
Kava ningv, osva tanam nomba manam manam,  
memba kavpa vildavpa, manara, kava elsusum  
manam manam vilangalmangas besalm viv.

<sup>19</sup> Wo kava yemba keknam ishunv, os sem-  
bayangnaoa ambo lotholohvra, osm Sesoava si  
henga wolaihaprinvav kamba yemba lilnam.

<sup>20-21</sup> Kava sembayang vev, osm Sesoa si yemba  
vinvav, osm yimba wevsabesalna avra, wo yimba

vivra, nomba osva himba temba undva vrevpa. Sesoava noi, pim ten sandhavm, indwonam alm, himba noi, ten wolaihaphonam pokamarini pina mendeklim Yesus Kristusm, mendekli sipsipna kekalvhonindrini. Sesoava wolaihaphona hemba, noinda tovolva hevna dahallinira. Henamba tovolva pinamba novmba wuleihinna, osm Sesoana moamba tanam, nom Sesoa ten wonvenam hevtindim. Wo hona moamba si mueisowa vevavmoa yunalm, wohloholm, nonapopolm alm beswonam.

Kava sembayang vev, osm Sesoava Kristus-nashara si vinvav pimba, noindava himba indk vethavpa. Wo eva Yesus Kristusnanamba himba pimba indkumbimba daswolvav no wevsana, hev ten und vevm, wo elsusva pivva hemba okulu-vmona vevra. Tanamta.

### *Eunilmoa.*

<sup>22</sup> Seh, kava yemba os ninginv, keknam beswonam hillivm hona moam, men kav novol vinvm yem, suwenamendna vowel ovolm. Wo heva os honamba memba tombaiva hutemothol, mani tokolma.

<sup>23</sup> Kava yemba osm vinv, yeoa nonora aevulvm, osoa pina boasalalva Timotiva doa pholahaphona buiriniva. Wo himba protava lelnamba kain-damba, kava si osva mongawulm epravav hei, yemba nongalalmba.

<sup>24</sup> Ishunu kana sehmoaoa indkumbim kuwulm mundilm pevnam, eva indkumbim Sesoatindim. Eva osoa vei, noi Romnind Kristusnind himba yemba piembinv sehmoa.

<sup>25</sup> Sesoaoa yemoa indkumbimoa wavra vowel vevra. Doata.

**Sesoana Besal Nemelmoa Walsana Moana  
Genesis, Ruth, Jonah, and The New Testament in the  
Waris Language, also called the Walsa Language, of  
Papua New Guinea**  
**Buk Stat, Rut, Jona, na Nupela Testamen long tokples  
Waris long Niugini**

Copyright © 2002 The Bible Society of Papua New Guinea

Language: Walsa/Waris (Waris)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

---

PDF generated using Haiola and XeLaTeX on 18 Apr 2025 from source files dated 31 Aug 2023

81136742-8dfd-57f5-95ae-cd3afb267b0d